

Museo y su amigonan ta tema di celebracion di 20 aña di Museo Arqueologico Aruba

ORANJESTAD (AAN): Dia 21 di December venidero Museo Arqueologico Aruba ta cumpli 20 aña di existencia. Na 1981 Museo Arqueologico Aruba (MAA) a ser inaugura pa, e tempo ey Diputado di Cultura y awe Prome Minister, Sr. Nelson Oduber den e edificio historico di Zoutmanstraat 1. E parti abao di e edificio na Zoutmanstraat tabata fungi como area di estudio y catalogacion di artefactonan. Ariba tabata situa e exposicion permanente cual a ser remodela na 1989.

Na su inicio e meta principal di MAA tabata presenta obhetonan di Indian haya na Aruba. Durante añanan a redefini e metanan y awendia estudio, documentacion, conservacion, maneho y promocion di e herencia arqueologico di Aruba ta enfoke di e museo.

E prome añanan MAA a sigui cu trabaonan di investigacion scientifico cu ya

tabata ser haci prome cu establecimiento di e museo. Esaki principalmente pa arqueologo drs. Egbert Boerstra di Instituto di Arqueologia y Antropologia di Antiyas Hulandes (AAINA). E "counterpart" di e arqueologo tabata Sr. Evelino Fingal kende pa hopi aña a fungi como Director di MAA. E personal e tempo ey tabata consisti entre otro di sr. Ignacio Wernet, Fransisco Croes y Angel Wernet kendenan a dedica añanan na e trabao di cuida y promove nos herencia arqueologico.

E historia di MAA ta largo y ta ehempel di e desaroyo di un entidad cultural cu awe tin un lugar significativo den nos comunidad. Pa es motibo aki a dicidi cu lo inicia e celebracion dia 9 di december venidero pero lo sigui celebra e 20 añanan di MAA den transcurso di henter aña 2002. Lo tin e.o. diferente actividad, un documentario filma y regularmente lo publica informacion den medionan di

comunicacion.

Pa e celebracion di 20 aña a scoge e tema "Museo y su Amigonan", cual tema lo ta esun di e Dia Internacional di Museo 2002. E tema aki ta ilustra un di e motibonan di e exito di e trabaonan di MAA. Tanto den museo como pafor MAA a logra haya hopi amigonan den transcurso di añanan. Esaki den forma di colaboradornan, gruponan sostenedor, instancianan cu ta pone fondonan disponibel etc. Pa conmemora e 20 aña, nos kier para un rato keto pues na tur e amigonan cu MAA a haya durante su añanan di existencia y e importancia di esakinan.

Diadomingo dia 9 di december lo inicia e conmemoracion cu e actividad "Bin Dorna e Kerstboom di Museo cu Boton". Henter pueblo di Aruba ta ser invita di 4'or pa 6'or di atardi pa bin MAA y yuda nos dorna e kerstboom cual lo ser poni den patio di Instituto di Cultura.

